



Berita KUKUM

SAMBUTAN TAHUN BARU CINA 2006, “THE RISE OF A DRAGON”

Penghuni Kolej Kediaman bersama Majlis Perwakilan Pelajar, Kolej Universiti Kejuruteraan Utara Malaysia (KUKUM) mengadakan Majlis Sambutan Tahun Baru Cina 2006 “The Rise Of A Dragon”, pada 25 Februari 2006 bertempat di Dewan Serbaguna, Kolej Kediaman Pelajar, Kampung Wai, Kuala Perlis. Majlis yang bermula pada jam 8.30 malam akan disertai oleh seluruh warga kerja dan pelajar-pelajar KUKUM.

Menurut Sim Zheng Yuen, Pengarah Program Sambutan Tahun Baru Cina 2006, “The Rise Of A Dragon”, berkata, perayaan Tahun Baru Cina peringkat universiti tersebut diadakan adalah untuk mengumpul semua warga KUKUM di samping mengeratkan silahturahim di antara satu sama lain. Menurutnya lagi, majlis seumpama ini merupakan peluang yang terbaik untuk mengadakan perjumpaan besar-besaran di Kolej Kediaman selain daripada aktiviti-aktiviti yang telah diadakan oleh pihak pentadbir KUKUM.

“Sambutan Tahun Baru Cina atau Gong Xi Fa Chai ini diadakan antara lain untuk mengumpulkan semua warga KUKUM dan menghayati salah satu perayaan utama di Malaysia iaitu Tahun Baru Cina di samping menyerlahkan keindahan kebudayaan Malaysia hasil daripada integrasi dan persefahaman daripada tiga kaum utama”

Dalam majlis itu juga, persembahan robotik akan diadakan iaitu “The Longest Self-Moving Dragon”, sebagai titik permulaan untuk menempuh cabaran “Malaysia Book of Record” iaitu merekabentuk dan menghasilkan naga elektronik yang terpanjang di Malaysia melalui projek mega iaitu A Challenge to the Malaysia Book of Record.

Pelbagai acara yang menarik telah dirancang bagi memeriahkan Sambutan Tahun Baru Cina 2006 pada kali ini. Antara lain ialah persembahan kebudayaan oleh pelajar-pelajar KUKUM. Selain itu, Pelajar dari Universiti Sains Malaysia (USM), Universiti Utara Malaysia (UUM) dan pelajar sekolah rendah dan menengah di Perlis turut dijemput untuk membuat persembahan.

Majlis Sambutan Tahun Baru Cina 2006, “The Rise Of A Dragon” itu nanti akan dirasmikan oleh Y.Bhg. Lt. Kol. Prof. Dato’ Dr. Kamarudin Hussin, Rektor KUKUM dan Y.Berusaha Steven Lee, Pegawai Khas kepada Menteri Besar Perlis.

SAMBUTAN TAHUN BARU CINA 2006, “THE RISE OF A DRAGON”

